

di Faenza, di Santa Perpetua, di San Beneto, a domino Francesco da cha' da Pexaro, di sier Fantin, arziepiscopo di Zara; la qual era *etiam* in differentia, ma hora è secuto l'acordo. Fu presa.

Fu posto, per sier Francesco Trum, sier Piero Capello, sier Zacaria Dolfim et sier Pollo Pixani, el cavalier, consieri, e i cai di 40, de far uno provedador a Belgrado, per pregadi, con salario ducati 20, per mexi 16. Sier Antonio Trum, procurator, sier Piero Duodo, sier Antonio Loredam, el cavalier, savij dil consejo, messeno fusse venduto al publico incanto, et quelli danari vadino a sfalchar monte novo. Parlò sier Piero Capello, qual rispose a sier Antonio Trum, procurator; poi rispose al Capello sier Antonio Loredam, el cavalier. Et fo leto una letera di sier Vincenzo Venier, di sier Zuane, è li provedador, posto per sier Zorzi Corner, che scrive è bon loco e staria ben un retor; *unde* sier Piero Diedo (*sic*) si remosse et messe indusiar, et sia scripto al luogotenente a Udene dagi di questo diligente aviso di tutta la intrada. Et andò le 3 parte: 0 dil Trum, 60 di consieri, el resto dil Duodo, el cavalier, 37. Questa indusia fu presa.

Fu posto, per li consieri, uno acordo di sier Agustin di Garzoni, *quondam* sier Garzon, dil banco, qual vol pagar per il suo 3.^o el debito dil banco, ch'è ducati 48 milia, in anni 5, di danari dil sal, et molli à sotoscrito, altri non vol sotoscriver *etc.*, che li sia perlongà il salvoconduto, *ut in parte*. Et fu preso: 17 di no.

A dì 23. La matina non fo 0. Da poi disnar fo consejo di X, con zonta di colegio e altri, per certa parte voleva meter sier Luca Trum e compagni, cai di X, zerecha dar il sal, *ut patet*.

In questo zorno gionse l'orator di Hongaria. Fo mandato alcuni dotori et patricij a Margera contra, et alozato in la chaxa fo di Zuan Dario sul canal grando a San Vio; nome, domino Philippo More.

A dì 24. Fo gram consejo. Et compito di far li X e pregadi.

A dì 25. La matina fo in colegio l'orator hungaro, et presentò le letere di credenza, et dimandò li danari *etc.* Fo acompagnato da sier Lorenzo Orio, dotor, sier Marco Gradenigo, dotor, sier Alvise Bon, dotor, et sier Ulivier Contarini, dotor. Et il principe li fe' bona ciera, et ditto si consuleria *etc.* El qual orator, nome domino Filippo More.

Noto. Eri matina in colegio fu fato contestabele in la rocha di Cremona Jacomin di Val Trompia, contestabele, fidelissimo nostro; et in la rocha di Faenza Jacomo Antonio Ronchon, veronese.

Da poi disnar fo pregadi. Et fu posto molte taje, 301* di Verona, Vicenza et Padoa, di casi seguiti, *ut in eis*.

Di Franza, di l'orator, di Bles, di ... Il re va in Normandia et è partito. L'acordo si trata col re di romani siegue; il ducha di Geler è stretto. *Item*, à serito a' fiorentini non dagino fastidio a' pisani, e vol darli zudexi, et li nomina.

Da Milam, dil secretario. Di la morte dil conte Philippo Boromeo, primario citadim de li; et 0 da conto.

Di Roma, di l'orator, di 18. Scrive la morte li in Roma, a di ..., dil cardinal Lisboma, più vecchio di tutti li cardinali; e che 'l papa havia hauto ducati 40 milia d'oro, trovati.

Fo posto, per li savij, che le cassassion fate per li capetanij deputati, come ho scripto di sopra, e fate per li 4 vice colaterali zenerali per i lochi, disarmate in questo mexe, *videlicet* Cosma di Monte, Zuan Giacomo di Vil Marcha', Piero Philippo et Muro Nuovo *etc.*, et par siano stà cassi in dite mostre di le zente d'arme cavalli 129, che ditta cassazion se intenda esser confermà *in omnibus etc.* Presa.

Noto, fonno sopra certa parte di cassazion di cavali mezani *etc.* Fo contradiction: parlò sier Zorzi Emo, sier Polo Pixani, cavalier, consier, sier Alvise da Molin, sier Alvise di Prioli, savio a terra ferma, e altri; e uno messe indusiar. E questa fo presa, con gran credenze *etc.*

Fu posta una parte di la raza di cavali di Puja di la Signoria, certi ordeni, *ut in ea*. Presa.

Fu posto, per li savij, che 'l si desse ducati 1000 per conto dil credito dil cardinal Zen a la fabricha dil domo di Vicenza, hessendo stà per oratori vicentini questo suplichà a la Signoria. Fo presa.

Fo fato scurtinio di tre savij a terra ferma, ordinarij, in loco di sier Hironimo Capello, sier Tadio Contarini et sier Zorzi Pixani, dotor, cavalier, che compieno. Et rimaseno sier Hironimo Querini et sier Marin Zorzi, doctor, con titolo, et sier Alvise Pixani, dal banco, è di pregadi, *quondam* sier Zuane, dal banco, di 6 balote da sier Alvise Emo, cao dil consejo di X, *quondam* sier Michiel. Fono tolti sier Lucha Trum, cao dil consejo di X, sier Marco Zorzi, fo savio a terra ferma, sier Bernardo Barbarigo, fo savio a terra ferma, *quondam* serenissimo, sier Francesco Foscari, fo savio a terra ferma, *quondam* sier Filippo, procurator, et altri; sì che sier Alvise Pixani ha anni zerecha 40.

Item, fo fato eletion di uno savio ai ordeni, in luogo di sier Vettor Capello, havia refudado; e ri-